

Ono što trebamo izbjegavati tokom posta

<"xml encoding="UTF-8?">

Najvažnija pravila lijepog postupanja pri postu

Ustezanje od onog što je Bog Svevišnji zabranio

1. Imam Ali, mir s njim, je prenio: *"Upitao sam Allahova Poslanika, s.a.v.a.: 'O Allahov Poslaniče, koje je djelo najbolje u ovom mjesecu?' Odgovorio je: 'O oče Hasanov, najbolje djelo u ovom mjesecu je ustezanje od onoga što je Bog zabranio.'"*[1]
2. Allahov Poslanik, s.a.v.a., je rekao: *"Bog Svevišnji kaže: 'Onaj čiji organi ne poste od onog što sam zabranio nema potrebe ostaviti hranu i piće u Moje ime.'"*[2]
3. Allahov Poslanik, s.a.v.a., je rekao: *"Postać koji se zagleda iza neke žene sve dok mu se ne ukaže oblik njezina tijela ispod njezine odjeće, pokvario je post."*[3]

Klonjenje ogovaranja

4. Allahov Poslanik, s.a.v.a., je rekao: *"Postać je u robovanju Bogu (ibadetu) i dok spava u svojoj postelji, ako ne bude ogovorio muslimana."*[4]
5. Allahov Poslanik, s.a.v.a., je rekao: *"Ko ogovori nekog muslimana njegov post je ništavan i njegov abdest je pokvaren."*[5]
6. Allahov Poslanik, s.a.v.a., je rekao hazreti Aliju, mir s njim: *"O Ali, čuvaj se ogovaranja i prenošenja tuđih riječi jer ogovaranje kvari post, a prenošenje tuđih riječi donosi kaznu u grobu!"*[6]

Izbjegavanje psovanja

7. Allahov Poslanik, s.a.v.a., je rekao: *"Nema nijednog dobrog roba koji bude grđen pa odgovori: 'Ja, zaista, postim, neka je mir s tobom, ja neću grditi tebe kao što si ti izgrdio mene!', a da Gospodar Svevišnji ne kaže: 'Moj rob je postom tražio zaštitu od zla roba Moga pa sam ga zaštitio od džehennemske vatre.'"*[7]
8. Allahov Poslanik, s.a.v.a., je rekao: *"Nemoj grditi drugoga dok postiš; ako neko bude tebe grdio, ti reci: 'Ja, zaista, postim'; ako budeš stajao, tada sjedi!"*[8]

Izbjegavanje licemjerstva

9. Allahov Poslanik, s.a.v.a., je rekao: *"Ko posti iz licemjerstva počinio je širk."*[9]

Izbjegavanje svega što Bog Svevišnji ne voli

10. Allahov Poslanik, s.a.v.a., je rekao: *"Zaista, nije post samo ustezanje od jela i pića, nego je post ostavljanje besposlice i sramotnog govora. Ako te neko bude grdio ili prema tebi nerazumno postupao, ti reci: 'Ja, zaista, postim!'"*[10]

[1]Fedailu-l-ešhuri-s-selase, str. 78, predaja 61.

[2]Tarihu Isbihan, sv. 2, str. 124, predaja 1280.

[3]Me'ani-l-ahbar, str. 410, predaja 95.

[4]Kitabu men la jehdulu-l-fekih, sv. 2, str. 74, predaja 1772.

[5]Kitabu men la jehdulu-l-fekih, sv. 4, str. 15, predaja 4968.

[6]Tuhafu-l-'ukul, str. 14.

[7]El-Kafi, sv. 4, str. 88, predaja 5.

[8]Es-Sunenu-l-kubra li-n-Nesai, sv. 2, str. 241, predaja 3259.

[9]Musnedu Ibn Hanbel, sv. 6, str. 82, predaja 17140.

[10]Sahihu Ibn Hibban, sv. 8, str. 256, predaja 3479